

Inatsisartut Suleriaasianni § 33, imm. 3. nr. 1 naapertorlugu Nunat Avannarliit Killiit siunnersuisoqatigiiffianni Inatsisartut aallartitaasa siulittaasuata Josef Motzfeldtip aalajangiiffisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutit aalajangersagaanik nr. 4/2010-mik, ataani allassimatut oqaasertalimmik, Inatsisartut tapersiinissaannik Inatsisartut aalajangiiffisassaattut siunnersuut:

Nunat Avannarliit Killiit Siunnersuisoqatigiiffiata Islandimi naalakkersuisunut, Savalimmiuni naalakkersuisunut Kalaallit Nunaannilu Namminersorlutik Oqartussanut kaammattuuti-gaat nunani pineqartuni ataatsimut aalisagaqatigiit iluaqutiginiarneqarnerisa aqunneqarnerat pillugu suleqatigiinnermik pilersitseqqullugit. Naalakkersuisut pineqartut kaammattorneqarputtaaq ataatsimut aalisagaqatigiit iluaqutiginiarneqarnerisa aqunneqarnerat pillugu nunat allat isumaqatiginiarneqarnissaasa suleqatigineqarnissaasalu pilersaarusionerqartarnerat eqqarsaatigalugit suleqatigiittaqqullugit.

Nassuiaat.

Nunat avannarliit killiit tamarmik, Savalimmiut, Kalaallit Nunaat Islandilu, imartaminni aalisarnerup tamarmi piujuartitsinissamik tunngaveqarnissaata qularnaarneqarnissaa anguniartuarpaat. Nunat pineqartut tamarmik nalunngilaat nammineq allallu misilittagaat tunngavigalugit aalisapilunneq sunik kinguneqarsinnaanersoq. Taamaattumik nunat pineqartut piujuaannartitsinissamik najoqutaqarnissaq ilumooruppaat.

Nunat avannarliit killiit aamma nalunngilaat nunani ataasiakkaani aalisakkat iluaqutiginiarneqarnerat eqqarsaatigalugu erseqqissunik aalajangersimasunillu malittarisassaqaqarnissaq qanoq pingaaruteqartigisoq. Kisiannili nunat avannarliit killiit marluk arlallilluunniit akornanni ataatsimut aalisagaqatigiit aalisapilunneqartarsinnaanerat ataatsimut uteqqiattumillu ajornartorsiutaavoq.

Nunat Avannarliit Killiit Siunnersuisoqatigiiffiat 2010-mi juunimi nunani avannarlerni killerni aalisarnermik aqutseriaatsit assigiinngitsut pillugit aalajangersimasumik qulequtaqartitsilluni ataatsimeersuartitsivoq. Ataatsimeersuarnermi inerniliussat pingaarnerit ilagivaat ataatsimut aalisagaqatigiit piujuaannartitsinermik tunngavilimmik aalisarfigineqartarnissaat qularnaarniarlugu pisariaqarnerat nunat ataatsimut assigiinngitsunik aalisagaqatigiiffiusut taakku aalisarneqartarnerisa aqunneqarnerat pillugu suleqatigiittariaqartut peqatigiillutillu aalajangersarsinnaasariaqaraat ataatsimut aalisagaqatigiinnit taakkunanga ukiumut qanoq amerlatigisut pisarineqarsinnaassanersut.

Nunat Avannarliit Killiit Siunnersuisoqatigiiffiata taamaattumik nunani avannarlerni killerni aalisarnermut ministerit kaammattorpaat ataatsimut aalisagaqatigiit aalisarfigineqartarnerisa aqunneqarnerat pillugu pisortatigoortumik suleqatigiinnermik pilersitseqqullugit. Ministerit kaammattorneqarput ataatsimut aalisagaqatigiit aalisarfigineqartarnerat eqqarsaatigalugit suleqatigiinnermut ataatsimut malittarisassioqqullugit, taamatullu aamma ataatsimut aalisagaqatigiit iluaqutiginiarneqarnerisa aqunneqarnerat pillugu nunanik allanik isumaqatiginninniarnernut suleqatigiinnernullu ataatsimut piareersartaqqullugit. Avataaneersunik isumaqatigiinniarnerni ataatsimut isumaqarnikkut Nunat avannarliit killiit ataasiakkaaratik peqatigiikkunik nukittunerussapput.